



Delhi nung mezüngbuba JN.1 putet

New Delhi, December 27, 2023 (Agencies): Bodbarnü Delhi nung mezüngbuba Covid-19 sub-variant putetogo ta Union Health minister Saurabh Bharadwaj-i ashi.

"Genome Sequencing atema sample 3 yokba nungi ka JN.1 aser ana Omicron lir" ta Bharadwaj-i osangbener dang ashi.

"JN.1 ya Omicron indang sub-variant ka lir aser shirang tera lir. Iba ya India anüolentip tsütsü prokshir. Iba atema petsaprong masütsüla kechiyong kangabo meshiranger" ta paisa ashi.

Arishi küm 28 tain ka Covid ajanga asü saka pa dak tanga tashidaktem liasü, ta Delhi sorkar ketdangtsü kati ashi.

"Iba nisungji Delhi nung alir masü aser pa tawa tu nija mozü ki ka nung aniok. Pa dak tashidak aika liasü aser Covid putet. Pa dak nungi agizükba sample genome sequencing atema bener yokogo aser osang ano mangu lir" ta ketdangtsü ashi.

December 26 nü India nung

nung nisung 40 dak JN.1 sub variant putet aser parnok züngsem nisung 109 kumogo ta Union health ministry ajanga metetdaksü.

Parnok ya Gujarat nung 36, Karnataka nung 34, Goa nung 14, Maharashtra nung 9, Kerala nung 6, Rajasthan o Tamil Nadu nung pezüzü aser Telangana nung 2 lir.

JN.1 (BA.2.86.1.1) ya August 2023 nü Luxembourg nung mezüng putet aser iba ya SARS COV2 indang lineage (Pirola) nungi jakzükba ta ashir.

Taoba hopta Union health secretary Sudhansh Pant-i state aser Union territory ajak dang public health measures shitak inyaksü aser benjung mapang COVID-19 azüoktsü maparen inyaksü shia liasü.

Paisa mozü ki ajak nung Influenza-like Illness (ILI) aser Severe Acute Respiratory Illness (SARI) mita repringtsü aser district ajak nungi osang sangoktsütsü tetuyuba agütsüogo.

NE CM temi benjung salem aben



Guwahati, December 27, 2023 (Agencies): Hombar (December 25) nü Northeast nung Khristantemi Christmas kanga longsopepa mongogo.

Meghalaya, Nagaland aser Mizoram nungi chief minister temi Christmas salem metetdakja liasü.

"Taküm küm tatalokbatem ajak atema pelasete nenok ajak dangi tamang, teimla aser temeim agi asüngba Christmas aser New Year salem abener" ta Meghalaya chief minister Conrad Sangma-i ashi.

"Yisu asoba sayatenya ajanga asenok takümtem nung sayatenyatem atalokdakjang aser teimla aika aliba 2024 moajangma" ta Conrad-isa ashi.

"Christmas osangji temeim, yimjung, tepela aser teimla lir aser iba ajanga asen temulungjang aser ki süngdakjangma. Nenok ajak dangi Merry Christmas salem abener" ta Nagaland chief minister Neiphiu Rio-ia metetdaksü.

"Nisung ajak dangi temeim aser tepela agi asüngba Merry Christmas salem abener" ta Mizoram chief minister Lalduhoma-ia ashi.

"Asenok New Year-i ayaoka aitsü mapang tonga arudang, asenoki asen linük atema teimla, telongjem aser azükaru asentenshidi. Asenok longjemer asenok jakdang aliba maongkatem agidi" ta Lalduhoma-isa ashi.

NE nung Dec 31 tashi tsüsü alatsü

Guwahati, December 27, 2023 (Agencies): India Meteorological Department (IMD)-i Bodbarnü Northeast ajungalen tsüsü temeim alatsü osang metetdaksüogo.

December 31, 2023 tashi Assam, Meghalaya, Nagaland, Manipur, Mizoram aser Tripura nung tsüsü alatsü ta IMD-i ashi. Arunachal Pradesh kübok tesem kar nung tzünglu terara arutsü saka Assam, Meghalaya, Nagaland, Manipur, Mizoram o Tripura nungbo taruba ghonda 24 tashi tzünglu marutsü ta IMD-isa metetdaksü.



December 25, 2023 nü NBCC Convention Centre Kohima nung Youth Choir-i ken atandang agiba noksa ka angur.

PM-i Chief secretaries senden ketdangsüa agitsü

New Delhi, December 27, 2023 (Agencies): Prime Minister Narendra Modi-i December 28 aser 29 anogotem tasembuba National Conference of Chief Secretaries ketdangsüa agitsü.

Taküm mungdang indang ranglokji 'Ease of Living' lir aser iba ya state ajak den amalitepa unified development agenda & action plan renemtsüba lir.

Iba mungdang nung sub-theme 5- land and property, electricity, drinking water, health aser schooling dak sendakba onüktem benoka lemsatepsü.

Maneni, cyber security challenges, AI, aspirational block & district program, schemes indang special sessions agitsü.

National Conference of Chief Secretaries ya sorkar ketdangsubaren nung shilem agitsü aser Centre o state sorkartem tsüngda tesentaktep

akangshitsü alizüng yur ayonga agir.

Taküm mungdang nung nisung 200 tema shilem agitsü aser parnok ya Centre sorkar nungi ketdangsurtem, chief secretaries aser state/Union territory tem nungi ketdangsurtem lir.

Mezüngbuba mungdangji Dharamshala nung June 2022 nung agia liasü aser iba sülen January 2023 nung Delhi nung agi.

Viksit Bharat Sankalp Yatra: Prime Minister Narendra Modi-i Viksit Bharat Sankalp Yatra indang beneficiaries den jembidang welfare scheme ajanga ajanzükertem dak otsü tajung aika lir ta ashi.

Viksit Bharat Sankalp Yatra ajanga nisung ajak dangi sorkar schemes atongtsü meranger aser iba ajanga meta talang pilar alidak

atongba den nübertem sendakteper ta PM Modi-i ashi.

Paisa linük nung nübertem dang aser talisa tetsürtem dang iba sentong takok tulu ngudaktsüba atema pelaba metetdaksü.

Iba Yatra ya anogo 50 shi tejaklen tenzük saka linük nung yimsüng aika tongogo ta Modi-isa shisem.

Iba Yatra tenzükba sülen nisung lakh 4.5-i Ujjwala Gas connection atema applications agütsüogo, Aayushman cards crore 1 tema lemogo aser nisung crore 1.25 shi ka health check-ups süogo ta pai metetdaksü.

"Tetsür crore 10-i self-help groups nung denogo aser bank temi parnok nem Rs 7.5 lakh crore agütsüogo. 'One District, One Product' ajanga nisung taküm aika melenshitsu" ta PM Modi-isa metetdaksü.

Rahul Gandhi-i 'Bharat Nyay Yatra' agitsü

Guwahati, December 27, 2023 (Agencies): Congress lennir Rahul Gandhi-i Bharat Jodo Yatra takok ngua agiba sülen Bharat Nyay Yatra agitsü osang metetdaksüogo.

Bharat Jodo Yatra ta linük anüolentip tsütsü nungi anüdoklentip tashi agia liasü aser Bharat Nyay Yatra ya anüdoklen nungi anüolen tsütsü agitsü.

Rahul Gandhi-i January 14 nü Manipur yimtiba Imphal nungi Bharat Nyay Yatra tenzüksü aser March 20 nü Mumbai nung tembangtsü.

Manipur nungi Mumbai tashi Bharat Nyay Yatra agidang Rahul aser Congress lennirtemi tetsüng aser bus gari ajanga kilometre 6200 asemtsü.

Iba mapang Rahul-i lanur, tetsürtem aser tangar memenepba nisungtem den ajurutepa sensaksemtsü.

Bharat Nyay Yatra mapang state 14 sema senzütsü aser Northeast nungia Manipur, Nagaland, Assam aser Meghalaya dena lir.

Tanüngba state temji West Bengal, Bihar, Jharkhand, Odisha, Chhattisgarh, Uttar Pradesh, Madhya Pradesh, Rajasthan, Gujarat aser Maharashtra lir.

Bharat Nyay Yatra agidang State 14 nung district 85 asemtsü. "Rahul Gandhi-i mezüngbuba Bharat Jodo Yatra nungi aika ajangshiba sülen iba Yatra

tenzüksü. Iba Yatra ajanga kilometre 6200 asemtsü aser lennirtemi bus gari ajanga aser tesem kar nungbo tetsüng agi senzütsü" ta Congress lennir KC Venugopal-i ashi.

"Congress züngsemtemi Rahul Gandhi dang Yatra ya East nungi West tashi agitsü ashi aser pai mulunga agizük" ta Venugopal-isa ashi.

Külen, Congress-i Brihostibar Foundation Day nung Nagpur nungi 2024 national poll campaign tenzüksü.

Iba sentong nung Congress president Mallikarjun Kharge, Sonia Gandhi, Rahul Gandhi aser Priyanka Gandhi nunger den chief minister asem aser state party tirtem adentsü.

Assam Rifles temi maparen balala inyak



Dimapur, Luchii/December 27 (TYO): Lt Gen H S Sahi, AVSM, YSM, SM, GOC Spear Corps ajanga December 27, 2023 nü Indo-Myanmar arütsülen aliba Assam Rifles Battalions semdanga liasü.

Iba mapang General Officer ya meina Inspector General Assam Rifles (North) aser Commander 25 Sector Assam Rifles oa liasü.

Parnoki iba mapang Longding, Khonsa, Jairampur aser Miao tesemtem semdanga parnok inyakyim asadang aser Assam Rifles temi region nung yimjung asoshi maparen balala inyakba atema tenüngsang agüja liasü.

Region nung aliba sepaitem tashi itshitsü mechi NGEs hadir balala yua aliba indanga General Officer dang ashi. Pai maneni sepaitem dang mapa tajung inyaktsü ajungshia liasü.

Bishnupur, Manipur nung December 27, 2005 nung duty inyakba lia takum bendanga agütsüsang asür Rfn Huidrom Bijendro Singh, SC(P) nem akum agüja naro inoktsüba sentong ka Ghaspani nung aliba Unit War Memorial nung agia liasü.

Iba sentong nung officers asem, JCOs 20 aser Assam Rifles nung danga rank nung alir nisung 201 dena liasü, kong asür Rfn Huidrom Bijendro Singh-i pa takum bendanga agütsüba indang otsü shia liasü.

IGAR (N) kübok Assam Rifles temi Nagaland Civil Service nung probationers

atema orientation training ka Kohima nung December 18-22, 2023 anogotem agüja liasü.

Iba Orientation Training Capsule nung probationers nisung toku (tebur tenet aser tetsür ana) dena parnok nung Assam Rifles indang Operational, Administrative aser Training indang angazükdaksü.

Probationers tem ya mezüing Kohima Battalion ajanga agizüka parnok dang Assam Rifles indang yimya balala sayu.

Iba sülen anogo asem nung parnok dang Battle Obstacle Course, live firing, physical training, mobile check post aser danga maparen balala Kohima, Chieswema aser Jessami nung inyakba sayua liasü.

Kasa mapang probationers temi yimtsüing balala nungi GBs aser VCCs tem den sendaksema liasü. NCS probationers temi NIEDO nungi kaketshirtem den sensaksema parnok dang meranga azüngtsü ajungshia liasü.

Parnoki COB, Jessami aser COB, Pfutsero semdanga yangjia sepaitem den sensaksema liasü.

Maneni parnoki Maj Gen Vikas Lakhera, SM, Inspector General Assam Rifles (North) aser Brig Herjinder Singh, Deputy Inspector General, 5 Sect Assam Rifles nung den sensaksema tangazükba balala ngua liasü.

Nüburtem den telungjem aser tesendaktep nung alitsü, amalitep akatsü aser security

mera ka ama Assam Rifles temi December 27, 2023 nü Mimi yimtsüing nung Indo-Myanmar arütsülen aliba yimtsüing balala nungi lenirtem den Security Coordination Meeting ka mena liasü.

Iba senden nung yimtsüing pongu nungi nisung 19 aser Village Guards 10 dena liasü.

Iba senden ya "Peace and Preparedness" omen nung ajemdaker amen aser iba mapang security forces aser yimdaklirtem tsüngta tesendaktep tajung aliba sayua liasü.

Assam Rifles aser yimtsüing balala tsüngta tesendaktep tajung aliba indang iba senden nung jembi aser tensa-mapang balala nung kati ka yariteptsü jembia liasü.

Maneni Assam Rifles temi Chakhabama nungi yimten yimsüsür aser GBs tem den senden ka December 27, 2023 nü ayongzükba liasü, kong Sakhabama, Dihoma, Kezo town, Kikruma, Kezoma aser Kidima yimtsüingtem nungi GBs, VC secretaries, VCC ajak agi nisung 30 arua dena liasü.

Iba senden ya "Unity in Diversity" omen nung ajemdaker nüburtem den tesendaktep tali tajungba nung alitsü nükdjong nung ayongzükba liasü.

Iba senden nung Agniveer aser SSC GD rally atema registration agitsü osangtem yimdaklir nem agütsü aser armed forces nung adentsü ajungshia liasü.

Assam Rifles temi Kohima nung aliba Good Samaritan Senior Citizen's Home den Christmas benjong munga liasü. Iba mapang Assam Rifles temi teintet rogotem nem sempet aser amtsük agüja liasü.

Maneni December 25, 2023 nü Phek district kübok Avangkhu aser Ziphu yimtsüing nung Assam Rifles temi Christmas benjong munga nüburtem nem nanglong, saisapong oset lema agüja liasü.

Dimapur nung mejangjaba nisung tasü mang ka nguteta lir

Dimapur, Luchii/December 27 (TYO): Dimapur police ajanga sangdong ka nung ashiba agi, Khermahal, Dimapur nung A-one Motor workshop anasa arishi küm 30 shi tain nisung (tebur) tasü mang ka tang tesüdak ki ka nung nguteta lir ta December 12, 2023 anepdang 10:56 ako meta telephone ajanga East Police Station Dimapur dangi osang arua liasü.

Iba osang angazükba sülen East Police Station duty party

tem iba tesemi arsanga oa liasü. Ozüing agi melaba ama iba tasü mang dak tarak aliba reprangdang saka kecha mongutet.

Tasü mang ya post-mortem examination atema District Hospital morgue nung yua lir, anungji kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü metetdaksür, ta sangdong ajangasa ashi.

Nagaland Winter Expedition 2023 tenzükogogo



Dimapur, Luchii/December 27 (TYO): Association of Offroaders Nagaland tir, Kenzeu Lungalang-i December 27, 2023 nü CT Square, 7th Mile, Chümoukedima nung Nagaland Winter Expedition 2023 tenzüksü, koba 4x4 Attitude Expedition ajanga ayongzükba liasü.

Iba Winter Expedition 2023 ya anogo toku asoshi lir aser iba mapang Nagaland nung district 12 ayimjema India-Myanmar arütsü tashi aotsü.

Iba sentong nung dangalen nungi (Thar Bengaluru Club) gari 24 den India tesem balala nungi shilem agirtem aser

sentong ayonger nungi 'back-up vehicles' trok tashi shilem agir.

Iba Expedition nung Niuland, Wokha district kübok Sanis, Mokochung, Mon district kübok Longwa, Zunheboto, Kohima district kübok Tuophema, Phek district kübok Pfutsero aser Peren district kübok Benreu semdangtsü.

Nagaland ya alima nung 'Off-road capital' kumdaksütsü Chief Minister nükla aliba tali temaba jenjangi ajungketa iba sentong ya ayongzükba, ta 4x4 Attitude Expedition nungi Yanrenthung Jamio-i iba sentong nung ashi.

CAA ya linük ozüing lir: Amit Shah

Kolkata, Luchii/December 27 (Agencies): Tawa Union Home Minister Amit Shah-i West Bengal semdangba mapang state nung Citizenship Amendment Act (CAA) mapa kuma inyaktsü BJP temulungtetba lir ta ashi.

Pai iba ya linük ozüing lir ta sangdong aser Chief Minister Mamata Banerjee-i iba dak sendakba nung asaa nüburtem mashi leni anir ta aitsü.

Shah ya Kolkata nung aliba National Library nung BJP indang social media aser IT wing züngsemtem den senden ka amendang iba o ya ashi.

Par party-i taruba elections

nung takok angutsü tejangja, ta pai ashi.

West Bengal nung Lok Sabha menden 42 aliba nungi BJP-i menden 35 dak tema angutsü, ta pai takzua liasü.

2019 elections nung BJP-i West Bengal nungi Lok Sabha menden 18 nung takok ngua liasü.

CAA ya mapa kuma inyakba ajanga takok angutsü aser iba ya ajanga ozüing alema aitba aser nashi shibelenba tatem kati arutsü aser tamangba yimsü tsütsü timtem balala ajurua aliba ki tilatem nem senso agütsütsü, ta Shah-i ashi.

West Bengal CM Mamata

Banerjee-i nüburtem nem CAA indang osang tiazü agütsür, ta paisa aitsü.

CAA ya Parliament nung agizükba ozüing ka lir aser ibai linük indang ozüing ka ama ajang-ajanga nokdaka lir aser iba ozüing amshiba nung shingaiia timtem magütsütettsü, ta pai ashi.

CAA ya 2019 küm agizük aser iba ya ajanga Pakistan, Bangladesh aser Afghanistan nungi December 31, 2014 masü dang India-i arua aliba Hindus, Sikhs, Jains, Buddhists, Parsis aser Christians ama 'prosecuted minorities' nem India senso agütsür.

Manipur nung nisung pezü apu

Imphal, Luchii/December 27 (Agencies): Bodhbarnü Manipur nung Churachandpur district kübok Kangvai tesemnung central reserve police force (CRPF) temi nisung pezü apu aser yangji Nagaland nungia arishi küm 47 tain tebur ka dena lir.

Parnok ya temelaba makai single barrel prangbong ka den injang ter bena aliba mechi apu.

Bodhbarnep 10:00 ako meta Imphal aser Churachandpur district headquarters sendaktepba state highway nung Kangvai tesem nung routine check-up aliba mapang par pezü ya apu ta ashir.

Imphal nungi Churachandpur leni oyaa aliba Maruti Alto gari ka CRPF temi anendaksü aser gari meita bushiba mapang prangbong den injang ya ngutet.

Pua alirtem ya Nagaland nung Peren district nungi arishi küm 47 tain Achok, arishi küm 26 tain Anwar Huissein, arishi küm 21 tain David aser arishi küm 22 tain Sahil Ahammed ta jangjaogo.

Maneni ozüing agi mela aliba maparen inyaktsü asoshi pua aliba nisungtem den prangbong, injang aser gari ya Manipur nung aliba police nem agütsüogogo.



December 27, 2023 anepdang New Delhi nung Navy sepaitem taruba Republic Day parade atema renemshidang tangokba noksa nung angur.

CAA ya shingai nokdangtsü makok: Home Minister Amit Shah

Kolkata, December 27 (Agencies): Union Home Minister, Amit Shah-i Citizenship (Amendment) Act ya shingai nokdangtsü makok, kechiyong iba ya linük ozüing lir, ta ashi.

Paisa, West Bengal Chief Minister, Mamata Banerjee-i CAA dak sendakba nung nüburtem nem osang tai agütsür, ta aitsüogo.

Kolkata nung aliba National Library nung state BJP social media aser IT wing züingsemtem den senden amendang Amit Shah-i, BJP-i CAA ozüing ya mapa küma benoktsü, ta metetdaksü.

Shah-isa, sangküm Lok Sabha election nung BJP-i West Bengal nung Lok Sabha menden 42 nungi menden 35 nungbosa takok angutsü, ta ashi.

2019 küm Lok Sabha election nung West Bengal nung BJP-i menden 18 nung takok

ngua liasü. Senden tembangba sülen Bengal BJP media cell-i Amit Shah-i senden nung jembiba video clip ishika lemsatapa liasü.

Shah-i, "Taruba assembly election sülen BJP-i West Bengal nung sorkar akümtsü atema asenoki inyaksüla. BJP sorkar lira ozüing alema bendangertem state telungi aitba aser nashi shibelenba nokdangba den külemi yimsü nung ajemdaker reshikangshi ajangshirtem nem CAA ajanga senso agütsütsü," ta metetdaksü.

CAA dak sendakba nung Trinamool Congress tongti aser West Bengal Chief Minister, Mamata aija Shah-i, "Khen khenbo lai (Mamata) nüburtem aser refugees dang CAA ya linük nung benoktsü mesüra mebenoktsü ta jembiba parnok mangmangdaksür. Ni ya

züngbong ashir- CAA ya linük ozüing lir anungji iba ozüing ya shingai menokdangtettsü. Ibaji asen party temelungtetba lir," ta ashi.

2019 küm Parliament nung agizükba CAA ya Mamata Banerjee leniba nung TMC-i anemer.

Taoba Lok Sabha election aser assembly elections atema nüboyimba mapang nung BJP-i CAA ozüing agizüktsü, ta nangzüka liasü.

CAA ajanga Bengal nung BJP tashi taitba akümer, ta BJP lenirtemi bilemer.

CAA ajanga Pakistan, Bangladesh aser Afghanistan linüktem nung reshikangshi maremba ajanga 2014 küm December 31 anogo tashi nung India-i arua jenoka alir Hindu nungertem, Sikhs, Jains, Buddhists, Parsis aser Khristantem nem senso agütsütsü.

Rajnath Singh-i security tensa asadangtsü atema J&K semdang

New Delhi, Luroi/December 27 (Agencies): Tawa Jammu & Kashmir kübok Poonch district nung kiralongrartemi lenmang nung mendanger amakdang army pezü khasetba sülen J&K nung security tensa asadangtsü atema Bodhbarnü Defence Minister, Rajnath Singh Jammu tonga ogo, ta ketdangsertem osang ka ajanga metetdaksü.

Rajnath Singh den Army tongti, General Manoj Pande na

Jammu tonga aoba mapang nung tayimtsü anendak J&K Lt Governor Manoj Sinha aser General Officer Commanding-in-chief, northern command, Lt Gen Uendra Dwivedi nati tena agizüka liasü.

Jammu atongba sülen defence minister Rajouri Poonch sector-i ao.

December 21 nü kiralongrartemi Poonch district kübok sepaitem truck pongu amakba sülen sepaitemi

kiralongrartem mita aoba operation tenzüka liasü.

December 22 nüa kasa area nung civilian asem tasü mang anguba sülen tensa mejungi lir. Rajnath Singh-isa Rajouri district semdanga mangyimer kibong asemjia ajurutsü.

Rajouri nungi meyipa aruba sülen Singh-i Jammu nung aliba Raj Bhawan nung senden ka ayongzüka tongti ketdangsertem den külemi security tensa asadangtsü.

India nung Covid Sub-Variant JN.1 agi shiranger 109 kümogo

New Delhi, December 27 (Agencies): India nung ano nisung 40 dak COVID-19 sub-variant JN.1 putetogo aser ibaji densemabo linük nung iba variant agi shiranger ajak senteper 109 jungogo, ta Bodhbarnü ketdangsertem osang ka ajanga metetdaksü.

Gujarat nung nisung 36 dak iba variant putet, Karnataka nung nisung 34, Goa nung nisung 14, Maharashtra nung teku, Kerala nung trok, Rajasthan nung pezü, Tamil Nadu nunga pezü aser Telangana nung nisung ana dak iba variant putetogo; shirangertemji teimbaka kidang kija mongdar, ta ketdangsertemisa metetdaksü.

Taoba hopta NITI Aayog züingsem (Health), Dr. V K Paul-i, variant tasenba ya jungjunga bushisüingdangdar; state temi akokba tashi samples teimba tendangtsüla aser surveillance systems ajungkettsütsüla, ta metetdakja liasü.

Linük nung JN.1 sub-variant putetyonga kanga shisabulutsüsabo masü, kechiyong iba variant puteta alir shilem 92-ibo pei kidang dang monga treatment agitsü melunger, ta ketdangsertemi

metetdaksü. Taoba hopta Union Health Secretary, Sudhansh Pant-i shidi ajanga states aser Union territories dang benjung mongpu mapang nung coronavirus wara mapang benokba tenokdangba balala asentenshir benoktsüji kanga tongtibang asütsü, ta metetdakja liasü.

Union Ministry of Health & Family Welfare-isa states aser union territories dang district sasep nung Influenza-like Illness (ILI) aser Severe Acute Respiratory Illness (SARI) tendanga iba report metetdakjang, ta tuyua liasü.

Bodhbarnü health ministry-i, tesüiba anogo ka kija nung linük nung nisung 529 dak COVID-19 putetogo aser tang iba tashidak agi teshirangdakpur 4,093 lir, ta metetdaksü.

Tesüiba ghonda 24 tsüingda coronavirus agi shiranger nisung asem süogo; Karnataka nung nisung ana aser Gujarat nung nisung ka asü, ta health ministry-i metetdaksü.

JN.1 (BA.2.86.1.1) ya taküm August ita nung Luxembourg nung mezüing puteta liasü aser iba variant ya SARS COV2 indang BA.2.86 lineage (Pirola) nungi jakzüka lir.



December 27, 2023 nü Mirzapur nung Ganga ayongkümlen rong anishir telok ka mi wangtepdang tangokba noksa nung angur.

India aser Russia nati nuclear plant atema tezüngzüktep kar agi: Jaishankar

New Delhi, December 27 (Agencies): External Affairs Minister, S Jaishankar-i, India aser Russia nati Tamil Nadu nung aliba Kudankulam nuclear power plant indang units tasen ano kar amnoktsü atema kanga tongtibang tezüngzüktep kar agiogo, ta metetdaksü.

Jaishankar-i anogo pongunü atema Russia semdangba mapang yangji India nunger sensotem den jembidang pai iba osang ya metetdakja liasü.

Jaishankar-i, "Kudankulam nuclear power plant (NPP) atema units tali amenoktsü asoshi tanü onoki tongtibang tezüngzüktep kar agiogo," ta metetdaksü.

Kudankulam nuclear power plant ya India aser Russia naprong külem project ka lir.

Jaishankar-i, Russia ya sector aika nung India atema kanga tongtibang partner ka lir; item sector rongnung defence, nuclear power aser space

densema lir, ta metetdaksü.

Jaishankar-i, "Asenoki melung lemtetba linüktem den ang defence, space aser nuclear [energy] atema amalitepa inyaker," ta metetdaksü.

Paisa, sangküm January ita tashi nung linük ana nungi negotiation team senden mena India aser Eurasian Economic Zone tsüingda angati shishilembatsü atema ken o jembia tenzüksü, ta ashi.

Jaishankar-i Russian Deputy PM, Sergey Lavrov aser Industry Minister Denis Manturov na densema tongti ketdangsertem aika ajurua senden amentsü.

Jaishankar-i Hombar nungi tenzüka anogo pongunü Russia semdangba mapang nung linük ana tsüingda defence, energy & trade, currencies, connectivity aser investments tsütsü tashi itshitsü atema jembitsü, ta ketdangsertemi metetdaksü.



December 27, 2023 nü Haryana nung Jhajjar district kübok Chhara yimadak Congress lenir Rahul Gandhi-i Bajrang Punia leniba nung longkak aiter wrestler tem ajurudang tangokba noksa nung angur.



TIR YIMYIM

YIMOBILEM (EDITORIAL)

DIMAPUR YANGTEPNÜ, DECEMBER (LUCHII) 28, 2023

Yi jemner asü, yokner?

Nagaland nung aluyimtsü len sayua inyaksü watang tuluka lir. Ano, külen lanurtem dang mapa inyak sayutsü atema tapet sentong yanglua inyaksü asoshi kanga rongdak nungdak mapa ka kümogo. Item nungdaktem denji ano Nagaland-a tangar den kasasa renloka odi süra electric tashi peria agütsüsbaji government teinyaktsütem rongnung tongtibangtiba ka asütsüla. Iba denji government school aser mozü kitem aser ano gari lenmangtem agi nübortem anisüngzük teyari aguba dang masü, pei state agi pei nüma atangtsüsa item ajakji shitak ayutsüsbaji asenok ajak khuret kümogo. Ano, Nagaland nungsa süaka tenemtsüng lenmang ya apu dang masü saka lenmang songjen renemer yaktasa semzüksüla aser train agi Mokochung atongtsüla aser Mokochung nungi Nagaland anüdokleni yoktsüla. Item rongdak nungdaktemji kodang khuretsa bilema mapa kuma inyaksü tenzükdir, Nagaland nung yi ayokba mayokba aser yi ajemba aser majemba tebilemstü ya nübortem asoshi kanga rongdak nungdak amabo bilema maittsü. Aji oda, kodang asenoki asen lima tajungba kuma yangertsü asoshi khuretsa bilemdir, yi ayoktsü mayoktsü indang ya masü Nagaland nung Special Economic Zone shimteta yangji nübortem ajangzüksüsa sentong yanglua terenlok mapatem tenzüksü nungdakba indang nübortem den shisalemsatepnütsü. Tanü asenok Nagaland nung yi ayoktsü aser mayoktsü indang jembiba ya kidang jangpong nung tanü sorutsü maka yur shi achitsü machitsü indang jembir amai lir. Nagaland nung yi mayoktsü aser meyanglutsü ozüng zünga lir, saka teyanglua yanglur aser tayoka ayoker, anungji yi mayoktsü ozüng lateta alibaji tamakoka ta bilemer. Atangji, iba tamakokji mimbanga meyutet, ajisüaka Nagaland kongradaktsüba tia ya Nagaland nung yimjak nung yi ayokba aser ajemba agibo meyanglushitetsü. Aji oda, yi ayokba aser mayokba na prongla nukjidongji Nagaland tajungba kuma yanglushitsü atema asütsüla. Ajisüaka, yi ayokba ajanga Nagaland ya yi yanglur aser yi jemer lima kümdaktsüra, Nagaland ya yi agi meseper junga jajaa moutetsü. Nagaland nung yi ayoktsü aser mayoktsüba indang ya Naga nungertem rongnunga Aortemisa tejembiba aser süoki taiba asütsü südi, kechiyong Nagaland nung yi mayoktsüla aser meyanglutsüla ta sashia ola adokba ya arogotem rongnunga ABAM-isa tesashiba adoker amai angashir aser ano külen Nagaland nung yi yokdaktsünertemjia Aor yimsüsürtemiang ola tasashiba adoker amai angashir. Iba yongji yi tongpang ya maneni raradi asünungbo, akhi putu ama, Aor o Aor ana raratsüsa akümstü. Atangji, Naga nungertem rongnunga tzümar yi, IMFL yabo Aortemisa tejemnüba asü südi. Aji oda, Nagaland kümli nungi tanü tashi Aor yimsüsür aser turlurtemi yi ajemba otsütemji angadagra kongang mali kuma angar. Item otsütemji kakat kar nungbo tangari asenoka tejak metentetsüsa zülüja lir. Item tapaktemjibo mezülü, madok aser mataloka ta dang süner. Ajisüaka, tanü iba kin nung jagiang yimsüsürtemi anir yi ayoktsü jangrar süra, aji yi jemnüba agi asü mesüra yi jemdaktsünüba agi yi ayoktsü jangrar ta bilemdangtsüla. Atangji, yi ya nisungi yangluba chiyongtsü saka chiyongtsüa asüyonga tachi tajem meshira chiyongtsü agi tashidak akümer. Aji oda, chiyongtsüa asüyonga temesepba chiyongtsübo akok tashi machitsü, majemtsü aser mayoktsü ajungshitsüla. Tanü asenok tia majung, alu tajungba ayimtsü, mapa inyak tajungba angazüksü, nübortem nungdak light peria agütsütsü, gari lenmang shitak yanglutsü, train aser bus peria jajadaktsü, school aser mozü kidang nübortem shisatsü aser taneptsü shitak angutsüsa temulung agüja anepalutsü ta bilema inyaksü melen, telok ayongsemer anogo shia yimjak nung yi yokdaktsünüba jajaba nübortemji tajung tazü masü. Ashiko, karbo yi masü license yokner asütsü akok, ajisüaka yi ayoktsü temelaba agütsüba shiti yoka achiba sen jagi kechi koteka inyaktetsü? Ibai Aor o Aor na tongpang amato kümogo, tangarbo ajak ajemajema lir, ashiko, aji alima nung yi ayoker aser yi ajemertem azükarua maliba metetba agi asütsüa akok.

OLEMSABANG

Political lenirtem, Sayutsüngertem aser Ken atenertem.

~ S.Nuken Longkumer.
Naga United.

Alima ajunga nung kechi otzütem sudir süang political lenir amala nungtuogo taküm, sayutsüngertem nungtuogo taküm süang ken atener nungtuogo taküm süang par taküm jagi tangar atsua arutetsüsa aser tsngra songa jembiteter itemji alimai nükshir, iba sempet yabo nisungi rongsen jenti endoka bushi nunga mangutsü, item nüpurtem ya sempet rongnung sempet amai lir. Parnok sempet ya teyanglur Tsüngremi la tetsüpok nu menden nung renemer yok, alima nung meimchiri kangasa nükshia repranger saka Tsüngremi nisung kar dang alima anitsü shimteter yoker, alima nung nungtuogo taküm aika lir maparen nungtuogo taküm aser politiced lenir John F Kennedy U.S lima soteta liasü, otzü ashiba agi kodang Kennedy yagi telok nung o jembitsü tenzükdir telok ajak iba tensa nungji jangratemdaktsür aser nüpurtemji atsüa bener aruteterta otzü ajanga angazüker, koda jangratemtsü sempet, iba amaji tanü asen India lima nunga Mr. Modi ya ka soteta lir. Pai jembiba ola jagi nüpurtem atsüa arudaktsür yamaji asen state Nagalima nunga O Jembir lenir tajung Dr. S.C. Jamir ama, K.K Shana ama, Mr. Supu Jamir ama, Mr. Imna Along amala ya o jembir tetemjentakümtem lir. Parnok nem agütsüba sempet ya asenoki arishi yonga mangutsü, kechiaser teyanglur Tsüngremi yamaji renem. Sempet tajung asoshi tenüngsang agütsüdi, ano alima ajunga nung asür nungtuogo sayutsüngir Dr. Billy Graham ama, alima nung nungtuogo ken atener Mr. John Lennon amanungtugo Cliff Richard ama, lia arugo, tanü lima nungbo nungtuogo taküm aika adokogo, Tsüngremi item tesümangtsü sempet moatsüba ya asen sasa anguba masü saka asen sasa anguba ama bilemra, benschitsü merangra, tesama tia ajurutsü anasa lir, asenoki otzü kar shisateter kodang otzü bushidangdir nungtuogo ken atener John Lennon-i ken atendang mesüra jembidang O tilaka kodak mali mulumia mali ta onük tilatiri inoksema liasü, koda tesasatsü taküm teroto mapang anü iadok. Asenoki lesson tulu agiogo, Tsüngremi sempet tajung moaja lir, nüpurtem atsüa bener arutsü sempet, tsungro songa jembitetsü sempet, itemji atamata masü, anungji Tsüngrem tenungsanga amshira, nü taküm nung jangratema lir ano nür chirnurtem aser semchir nem iba sempet yutsütsü, yangi Titanic rong tulu ya tzüyim taroki kodanga maittsü ama rong yanglurtemi bilemra ama, parnoki tzüyim yangluba Kibuba Tsüngrem amadok asütsü, tangbo otzü kecha mali alima tilaka kümogo, joko Naga nungeri Naga nungertem yaritsü mapang tongja tongogo aramesoang aramesoang asen lima nung temeim mapa inyaksü aika lir.

Iba Olemsabang nung lemsaba ken-o aser shisatsü ya iba ocet züluri bilemra ken-o ama tazüngeru angateta agitsü mepishir

Yirusalem nung Arogo lenirtemi Israel Tir, Issac Herzog ajuru



Yirusalem nung Arogo leniremi Israel Tir, Isaac Herzog ajurudang tangokba noksa nung angur.

December 26, 2023: Yirusalem nung Arogo lenirtemi Israel Tir, Isaac Herzog ajuru pa dang Gaza nung rara anentsü atema mepishiogo.

Arogo lenirtemi ashiba agi, parnoki Israel Tir ajurubaji Khristmas mongpu tenung nung ajuruba dang masü saka alima tesem ajaklen Khristantem tenung nung Gaza nung azü tokshiba tangsa anentsü atema akhangtsü asoshi ajuruba lir.

Parnokisa Israel Tir dang, West Bank nung nüburtem timtemba aser talisa Khristmas mapang Bethlehem nung senzusempongba tsütsü tenokdangba balala agientsü atema mepishi.

Senden tembangba sülen Yirusalem nung Arogo lenirtemi sangdong ka ajanga, "Gaza nung rara tenzükba mapang nungi tenzükba Arogo nung tekolakpurtemi rara anentsü, civilian kümzüksü aser melungtet telok balalai teyari agütsüba mapatem menokdangtsü atema takhangba agüja arur," ta metetdaksü.

Arogo lenirtemisa Khristmas mongpu nung Israel aser Gaza na tsüngda rara

ajanga meimchirtem aika timtemba atema tesusaba lemsatep.

"Yirusalem nung Arogo nung tekolakpurtemi asen Kibuba, Yimjung Chuba aser küm 2,000 tejaklen yangi Bethlehem nung asosang Yisu Khrista tenung nung alima tesem ajaklen tamangertem den Khristmas salem lemsateper," ta parnoki sangdong ka ajanga metetdaksü.

"Kibuba asoba tesem nung timtem tulu aliba mapang ka nung onoki item salem osang lemsateper. Tesüiba ita ana ser tesadang tsüngda rara ajanga aseni meimba temeshi lima nung nisung million aikati timtem ajangshiogo. Rara ajanga region nung aliba kibong aika timtemdar aser alima tesem ajaklen nungi sasaa bilemetsüba lemsateper. Iba ama lima ka nung asenok nem teimla agütsütsü atema Kibuba aso. Mezüng Khristmas nunga tanü ama tensa ya liasü," ta parnokisa metetdaksü.

Israel Tir, Herzog-i Arogo lenirtem dang, "Hamasa teloki ozüng alema inyakba mapatem ya Yisu Khrista tesayubatem den meputep," ta ashi.

"Temenen teloktemi linük 40 nungi ozüng alema tai maket tetsürtem, tanurtem, taintem, lanurtem tepset, puer ao, tashiyim amshia raksatsü, tekolak tangzükba lepset aser rongseta sädaksü," ta Herzog-i ashi.

"Item mapatem ya osangtajung kaketem nung Yisu Khrista tesayubatem den meputep, mesüra Yihuda nunger yimsü tesayubatem den-a meputep, iba denji külemi Islam yimsü den-a meputep," ta paisa ashi.

"Asenok timtem, asenok ajaki ajangshiba timtemji Islam yimsü alia amangertem ajanga lir. Iba ya Tehran (Iran yimtiba) nungi Jihadist tangatetba ajanga adoker, anungji asenoki iba ya samatsütsüla. Ibayongji onoki iba tongbang raratsüsa aküm," ta paisa metetdaksü.

Gaza Health Ministry-i, tesüiba ghonda 24 tsüngda nisung 241 tepsetogo aser nisung 382 yirugogo, ta metetdaksü.

Israel aser Gaza na tsüngda rara tenzükba sülen tang tashi nung Gaza nung nisung 21,000 jungnüa süogo, ta Gaza Health Ministry-isa metetdaksü.

Khristmas mapang Plateau State nung Nigeria nunger Khristan 96 tepset

December 27, 2023: Nigeria kübok Plateau State nung Khristmas atongtsü anogo ka dang lia yimtsüng 15 nung Khristan 96 tepset, ta International Christian Concern (ICC)-i metetdaksü.

December 26, 2023 nü Plateau State Commissioner of Police, Okoro Alawari-i sangdong ka ajanga, December 24, 2023 nü local government areas (LGAs) ana kübok yimtsüng 15 nung Khristan 96 tepset aser ki 221 rongdoktsüogo, ta metetdaksü. Alwari-i sangdong ka ajanga,

"December 24, 2023 aonung 10:00 ako meta Bokokos LGA kübok yim 12- Ndun, Ngyong, Murfet, Makunday, Tamiso, Chiang, Tahore, Gawarba, Dares, Meyenga, Darwat aser Butura Kampani amak. Iba denji kasa December 24, 2023 aonunga 10:45 ako meta Barkin-Ladi LGA kübok yim asem-NTV, Hurum aser Darawat amak," ta metetdaksü.

"Bokokos local government area nung yimtsüng 12 amakdang ki 221 rongdoktsü, motorcycles 17 den gari 8 rongdoktsü aser nisung 79

tepset aser Barkin-ladi local government area nunga nisung 17 tepset," ta paisa metetdaksü.

Police Commissioner-isa, iba area nung item ama tatalokba nokdangtsü atema sepai tali yoksemogo, ta metetdaksü.

Küm shia alima nung Khristantm teimtiba tepsetba linükji Nigeria lir, ta International Christian Concern (ICC)-i metetdaksü.

Tesüiba küm 20 tsüngda Nigeria kübok Middle Belt region nung Khristan 50,000 dak tema tepsetogo aser nisung million aika jenshiogo.

ANOGO ABEN TSÜNGREM DEN

Mapa aser Tenzükba

Anungji, adianutem, nenoki pei mang taküm tenla ka, temeshi aser Tsüngremi agizüktetsüsa tenlaang ta ni Tsüngrem yimlibilem agi nenok jungshir. Ibaji nenok tanela tekülemba lir. Rom 12:1.

"Ibaji kü temang. Iba nung ni kechi inyakner aji inyaktsü akok. Ni achitsü, ajemtsü, tanur raksaa endoktsü, mozü achitsü, moku achitsü!" Iba ama jembiba O nai angashia lir ma? Tanü putu tangatetbaji ibai ir.

Saka Tsüngremibo balaka sayur. Asenok temang taküm aliba tenla ka ama agüjang ta Pai ashir. Asenoki asen temang Tsüngrem nem koda agütsütsü? eTmang kaji asenoki asen temangji anepalutsüla aser meraksatsüla. Ano temang kaji asen tashi, temetetba, aser asenok sempet amshiba ajanga Tsüngrem aser tangar tenzüktsüla.

Ne teka agi chiyongtsü renema tangar nem agütsütsü akok. Ne mapang agi yaritsü akok. Ne tashi agi teyari nungdaka alirtem yaritsü akok. Asenoki Tsüngrem aser tangar tenzüktsüba mapa tanen maka lir. Tenzüktsü Khristai, asenok nungi imlar. Pa-a tenzükdaksütsü masü saka tenzüktsü aru (Mtt. 20:28).

Yisui Pa temang asenok asoshi temeshi aser taküm aliba tenla ka ama agütsü. Ibaji tematiba tenla lir. Asen temangji asenok amshinütsü amshitsü asen meyong masü. Khrista temang amaji asenok temangji tenzüktsü asoshi hatiar lir.

Yisu, onok temang, Na aser tangar tenzükba nung amshitsü yariang; Ne tenung nung. Amen.

FCA-i ayongzükba sentongtem nung nisung 51,000-i Khrista agizük



Fellowship of Christian Athletes (FCA)-i Hot Springs, Arkansas nung aliba Lakeside High School Stadium nung ayongzükba "Fields of Faith" sentong agidang tangokba noksa nung angur.

December 26, 2023: Taküm Fellowship of Christian Athletes (FCA)-i ayongzükba sentongtem nung nisung 51,000 dak temai Khrista agizükogo, ta FCA-i metetdaksü.

FCA-i sangdong ka ajanga, September 2022 nungi August 2023 tashi nung parnoki ayongzükba sentong balala nung nisung 51,730-i Khrista nem taküm bendanga agütsü, ta metetdaksü.

FCA Tir aser CEO, Shane Williamson-i, "Khristmas mapang nung asenoki agütsütsü sempet tajungtiba mesüra agizüktsü sempet tajungtibaji Khrista sempet lir. Asenok menen nungi kümzüktsü aser angati tekümtet agütsütsü atema Pa alimai aru," ta metetdaksü.

"Asenoki asen Kümtetdakba asoba bilemetba mapang nung Yisu Khristai FCA atema tajung inyakba bilemteter. Iba ministry ajanga

taküm kaketshir-saisaponger 51,730-i Yisu Khrista agizükogo," ta paisa metetdaksü.

FCA otongdar kati, "Coach aser volunteers densema saisaponger 51,730-i Khrista nem taküm bendanga agütsü. FCA-i 'Faith Response Tool' ka amshir, aser ibaji FCA staff tem, coaches aser saisapongertemi lemsatepba ajanga taküm nung tongtibang telemtetba agiteter," ta ashi.

2021-22 küm nunga FCA sentongtem nung nisung 52,358-i Khrista agizüka liasü. Taküm October ita nunga FCA-i Hot Springs, Arkansas nung aliba Lakeside High School Stadium nung "Fields of Faith" sentong ayongzükba agia liasü.

Iba sentong nungji nisung 3,000 dak tema aden aser Tanela Temeshii mapa inyaka kaketshirtem aika taküm melenshi.

AO OSHI ANGAZÜKDAK:
TANÜ ANGAZÜKTSÜBA OJANG



Shimakshimaka

(adj) temulung nung tepela mali (gloomy mood)
Asüama atalokba agi benjong shimakshimaka amung.

Shimdang

(v) tapu ana küma bendangba (separated)
* Benjong nung chiyongtsü mapang tanur o tain na shimdang.

OLONG PAITEP # 6653

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telesa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6652 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük,
- 11. teronem, 12. Sempa,
- 13. Jahaz.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :



Union Ayush minister Sarbananda Sonowal-i Arunachal Pradesh nung aliba North Eastern Institute of Ayurveda and Folk Medicine Research (NEIAFMR) nung capacity expansion atema lung azüngtsüba sülen agiba noksa angur. Iba mapatong ya Rs 53 crore endoka yanglutsü aser Academic Building, Boys & Girls hostel, staff quarter o building adentsü.

RSS tekolak Mohan Bhagwat-i Majuli semdang

Dibrugarh, December 27, 2023 (Agencies): Rashtriya Swayamsevak Sangh (RSS) tekolak Mohan Bhagwat-i Dibrugarh semdangi aruogo. Pai anogo ana amongdang Majuli semdangtsü. Iba tesem nung tamangba yimsü meyipba osangtem angashiba mapang ka Bhagwat-i semdang. Tanü Dibrugarh airport

nung RSS lennirtemi Bhagwat pelashishia agizük aser iba sülen pa Majuli-i apusoa ao. Iba mapang pai Majuli nung aliba Satras nung lennirtem Satradhikars den ajurutepa sendentem amentsü. RSS ya Hindu nationalism atema inyakba telok ka lir aser pai lisopur inyaksangshi aser sobaliba wazüka ayur. Mohan Bhagwat-i

Satradhikars den ajurutepa ya kanga tongtipang ama bilemer aser parnoki Hinduism wazüka ayutsü aser ajungkettsü atema asalentongtem yanglutsü imlar. Bhagwat-i Majuli semdangba sülen Dibrugarh-i aotsü aser RSS lennirtem den sensaksemtsü. Hokolbarnü pai Dibrugarh nungi Kolkata-i aotsü.

Manipur Information Commission-i online portal lapok

Imphal, December 27, 2023 (Agencies): Manipur nung sensotem khuret lemsateptsü atema December 27 nü online portal ka sayaogo. Supreme Court-i tuyuba ama Manipur Information Commission-i 2nd Appeal aser

Complaint case atema online filing (e-filing) asütsü facility lapoktsü. Iba facility atema complainant/appellant-i www.eservicesmanipur.gov.in nung teyari agitsü akok. Iba portal ya Chief Information

Commissioner Koijam Radhashyam-i lapoktsü. Sorkari technology amshia public yaritsü nangzükba ama portal ya lapokogo. Nisungtemi Consumer Commission mesüra Court dangi moi online ajanga ken o tem benoktsü akok.

Paresh-i aniba ULFA-I dena olemteptsüla: Bhupen Borah

Guwahati, December 27, 2023 (Agencies): India aser ULFA tsüingda yimjung tenangzüktep agiba sülen maparen tekaratiba nung tembangtsüla aser Paresh Baruah-i aniba telok dena sorkari olemtep tenzüksüla ta Assam Pradesh Congress Committee president Bhupen Borah-i ashi.

"ULFA-i den sendaktepba atema lanur aika taküm samaogo anungji onoki state sorkar dang khatapba anentsü akhanger" ta Congress lenniri ashi.

Taruba Lok Sabha elections nung BJP den tokteptsü atema Opposition party 15-i constituency 14 shia nung candidate kaka yoktsü lemtetogo ta Bhupen Borah-i ashi.



Tinsukia nung ULFA-I züngsem ana apu

Dibrugarh, December 27, 2023 (Agencies): Tinsukia nung Assam-Arunachal arrtsü anasa sepaitemi United Liberation Front of Asom-Independent (ULFA-I) züngsem ana puogo. Tena ya Sergeant Major Bibek Asom aser Mrigen Asom ta jangjaogo aser

Assam Rifles o Tinsukia police nati apu. "Tena Arunachal Pradesh den arrtsü anasa Phaneng-i aru. Sepaitemi tena senzüsenbongba osang angazük aser iba sülen bushitepa ao. Idangji Assam Rifles aser Tinsukia police külem telok kati apu" ta

police osang ajanga angazüker. Tesüiba anogo ishika Upper Assam tesemtem nung ULFA-I-i kanga bulua inyaksangshia arur. Police-i ULFA-I züngsem aika puogo aser ano par pezüi police dang nungi jena aotsü merangdang yirua liasü.

Israel-Gaza rara: Palestine nunger asür 20,000 alemogo



Gaza nung rara tenzüker anogo 82 jungogo aser UN Security Council nung teyari tali agütsütsü pangzüng ka agizüker anogo ishika lir Israel-i amakba tali kumogo. Tang tashinung Gaza nung nisung 20,915 tepsetba aser nisung 55,243 yiruba osang lir.

Gaza City, Luchii/ December 27 (Agencies):

Israel mitkar temi Gaza Strip nung military operation maneni agitar aser Gaza nung Hamas-i ketdangsüba health ministry ajanga ashiba agi, tesüiba ghonda 24 tsüngta nisung 241 tepsetogo.

Palestine Tir Mahmoud Abbas-i iba rara ya par nübur anema "grave crime" ka lir ta ashi aser Israel army tekolakba Herzi Halevi-i Hamas den raraba ya ano ita agia alitsü akok ta shiogo.

Gaza tiyonglen tanen makai ali nung operation agiba mapang Mongulbarnüa tesem 100 dak tema amak ta Israel-i ashir.

Bodhbarnepa Israel den arütsüa aliba Gaza Strip tesem ajungalen ola tulu adoka apokba angashiogo.

Occupied West Bank nunga Palestinian medical osangtem ajanga ashiba agi, Israel-i drone amshia Tulkarem nung aliba Nur Shams refugee camp amakdang Palestine nunger nisung trok tepset.

Kasa ghonda 24 tsüngta nisung 382 yirugo ta Gaza indang health ministry ajanga ashir.

Ministry ajanga ashiba agi, hopta 11 dak tali rara aruba mapang Palestine nunger nisung 20,915 tepsetogo aser parnokji timba tanur aser tetsürtem lir. Kasa mapang nisung 55,243 yiruba osang lir.

Israel telung nung Hamas teloki anir telungpur temi October 7 nü tesem balala amakba sülen iba rara ya tenzüker. Iba anogo civilian timba sür nisung 1,200 shi tepset aser ao aser parnok karbo chiokogo.

Tir Abbas-i Gaza Strip nung rara ya asadangtsü mokoki timtem tulu aser nübur ajunga samatsütsü raraba dang nungia tali lir ta ashi.

Iba ama rara ya Palestine nunger puti otsü nung kodanga majangshidang, ta pai ashi.

Ramallah nung Egyptian TV channel den rara tenzüker mezüngbuba sensaksemba mapang, par litsü ya tenük agi majitetsüsa kumogo aser occupied West Bank ya mashi mapang samatsü, ta

tekumdangtsü ashi.

Ceasefire alitsü asoshi UN draft resolutions yangluba Washington-i nokdanga rara atsülangtsür, ta Palestine leniri US aitsü.

Israel Defense Forces (IDF) indang chief of staff, Lt Gen Halevi-i osangbener senden ka nung ashiba agi, Israel nunger takok mapang talangka atema wazüka yutetsü asoshi iba rara maneni ita aika alitsü.

"Temulung temerang aser raratsü temulungtetba nung aliba kiralongrarba lokti tentet ka jungjunga loksatsütsü asoshi tanatiba lenmang mali. Magic solutions mali," ta pai ashi.

Lisa mejungi liaka aser mapang agiaka Hamas lenirtem aputsü mesüra samatsütsü ta pai nangzük aser northern Gaza nung Hamas battalions ajunga IDF ajanga tesamatsür lir ta ashi.

Ceasefire sentong ka Egypt-i benoka lir ta Israel aser Arab media temi ashir.

Osang ajanga ashiba agi, iba sentong kübok Israel nunger pua alirtem aser Israel nunger jail balala nung Palestine nunger mezüngdangteti yua aliba mapang lemsar chioktsü aser Israel-i amakba anena atatsü.

Qatar tetsüngtai ia taoba mapang khen atema rara anena ataba mapang Gaza nung pua alirtem kar chiok aser iba melena Palestine

nunger tepuokdak yua alirtema chioka liasü. Iba sülen mapang talangka asoshi ceasefire alitsü ajungshiba Israel aser Hamas anaprongi magizüker.

Kasa mapang Israel-i tayimtsü amshia Lebanon south tsütsü arütsü anasa jila ka amakba nung nisung asem asü.

Mongulbar aonung Bint Jbeil jila nung ki ka dak bomb pokloksüba nung Hezbollah züngsem ka aser kinunger ana tepset, ta Iran den sendaktepa aliba Lebanese telungpur telol Hezbollah ajanga ashi.

Arütsü anasa Israeli posts nung Hezbollah teloki amakba sülen Israel-i amak ta ashir. October 7 nü Israel-Gaza rara tenzüker sülen Lebanon aser Israel tsüngta arütsülen tensa tamajungba kuma lir.

Bodhbarnü Lebanon indang National News Agency (NNA) ajanga nisung asem tepsetba ya Ali Bazzi, pa adianu Ibrahim aser tamo Shourouk Hammoud ta jangjatsüogo.

"Tsükchir indang tayimtsü temi ayatirm atongtsü lia arütsü nungi kilometre 2 shi pilar Bint Jbeil jila tiyong nung ki ka amak aser iba mapang nisung asem tepset aser kinunger ka yiru," ta NNA ajanga ashi.

Kinunger kati osangbener dang ashiba agi, Ibrahim Bazzi ya Australian senso aser hopta ana tejakdang pa arua liasü. Hezbollah-i Ali Bazzi ya par sepai lir ta sangdongogo.

Indonesia nung mapa inyakertemi longkak ait

Jakarta, Luchii/December 27 (Agencies):

China-i senotsü teyari agütsüba nickel processing plant ka nung mi lendong ataloka nisung 18 asüba den aika yiruba sülen, mapa inyakba tesem nung tekümzükba tali agütsütsü khanga Indonesia nunger mapa inyaker noklang aikati longkak aita liasü.

Bodhbarnü longkak aitba sentong nung mapa inyaker 300 shi-i shilem agia liasü, ta Serikat Pekerja Indonesia Sejahtera (SPIS) workers' union mendenbuba Katsaing-i metetdaksü.

"Company nungi onok takhangba tongtibangtibaji occupational health aser safety law sülen tashi anga anidaksü asoshi lir," ta pai Reuters news agency dang ashiba den anogo asem tsüngda takhangba mataloktsüra parnok strike ka ayongzüksü ta ashi.

Sulawesi asetkong kübok Morowali Industrial Park nung Deobar anepdang mapa inyakertem furnace repairs süa aliba mapang lendong ataloka liasü. Iba lendong nung Indonesia nunger ter aser China nunger ti asü.

Longkak aitertemi company

TSÜRABUR TEPELA TASOBA ANOGO

Mrs. Takasangla Lemdor (Kangtsung)

Tsüngrem temeim aser taochi ajanga, akümtsüba aliba temeim tsürabur Mrs. Takasangla Lemdor la tasoba anogo December 28, 2023 nü küm 100 (100 years) tashi arishi moatsüba asoshi Tsüngrem tenüng sanga iba anogo amunger.

Ano maneni teyanglur Tsüngremi shi aser tanüla nung tashi tasen moajang ta sarasademtsür.

~ Temeim Chirnurtem, Semchirtem aser Kinungertem.



TASOBA : Dec. 28, 1923

OFFICE OF THE KHAR LAISHIR TELONGJEM TEPELA LEMSATEPER



Khar Laishir Telongjem züngsem rongnungi tetemjen, tetangshi nübu wabong Rev. Yanger Walling, S/o. Late Imangdangba Walling, shibai mapang ajak nung lokti ajungkettsü mapa tajung jenti inyaka pa taküm, mapang, shisatsü, rongsen agi mokokmeiner, leni maor, lajamenjartem nungdak peridakja aru, Pai taküm 2023 A. Kevichusa Citizenship Award ngutetba tepela lemsatepa Tsüngrem sentsüwangshidaksür.

Tulusang Tsüngremi pa aser par kibong ano tali ajungketa moajangma.

Sd/- ARENKABA PRESIDENT

Sd/- ESTHER GENERAL SECRETARY

Mulungnen O



ASO : 14.05.1985

ASÜ : 14.12.2023

Asür Alemtoshi

Onoki teti meima aliba Asür Alemtoshi (Longkong), pa shirang yipden nung alidang nungi iba akümüli wadang tatem tashi nung arogopur, lokti balala aser kija kibong shirnokisa shisatsü, nübo aser rongsen agi ozü dang temeim sayuogo, nenok ajak dang ozü mulung taroktiba agi pelaba iba osang kaket ajanga lemsateper.

Tsüngremi nenok ajak moajangma ta ozü sarasadem.

Temeim Kinungtsü, Tsürabur aser Kinungertem.

achaayangertem nem takhangba 23 agütsüba, mapa inyakertem tenüng nung unions lenirtemi police nem shiti ka agütsüba ajanga jangjaogo.

Takhangbatem rongnung, smelters tajungba anepalutsü, health clinics tajungba küma yanglushitsü aser China nunger mapa inyakertem nem Indonesia oshi angazükdaksütsü densema lir.

Deobarnü mi ya Indonesia Tsingshan Stainless Steel (ITSS) meyong nickel smelter furnace nung adoka liasü. ITSS ya China indang Tsingshan Holding Group nung unit ka lir.

Iba tesem nung inyakyim anena lir aser police temi mi adokba kuli bushisingdangdar, ta Morowali Industrial Park otongdar Dedy Kurniawan-i ashi.

Iba industrial park ya ali hectares 3,000 nung amenoka lir aser company balala atema nisung 70,000 inyakdar.

"Bodhbarnü longkak aitba sentong ajanga inyakyim nung mekongshi aser yimjung nung dang agiogo," ta Dedy-i ashiba den, company ketdangsurtemi mapa inyakertem rongnungi lenirtem den sensaksemdar, ta shisem.

Küm 8 sülen Dipa Karmakar senior nationals nung asayatsü



Luchii/December 27, 2023

(Agencies): Nüngtugu gymnast Dipa Karmakar, küm ti sülen taruba hopta nungi tenzüka Bhubaneswar nung asayatsü aliba Senior Artistic Gymnastics National Championships nung asayatsü.

Iba asayamung ya January 2 nungi 4 tashi asayatsü.

Dipa dak alia iba asayamung

nung Tokyo Olympian Pranati Nayak, Yogeshwar Singh, Rakesh Patra, Tapan Mohanty, Saif Tamboli, Gaurav Kumar nungeria shilem agiba angutsü.

"Dipa Senior nationals nung asayatsü. La tatemsa domestic asayamung nung 2015 küm asaya liasü," ta la indang coach Bisweswar Nandi-i ashi.

Agartala nungi arishi küm 30

tain asayar ya India tsür gymnast tem rongnungi mezüngbuba Olympics nung asaya liasü. La trials nungbo temaba jenjang nung liasü saka Asian Games nung masayatet, kechiyong lai SAI indang selection criteria majangtet.

Iba sülen la tenokdangba agütsür aliba mozü amshiba atema ita 21 tenokdangba agütsü aser ibayongji la asayamung kecha nunga shilem magitet.

Odisha nung Junior aser Senior Artistic Gymnastics National Championships asayatsü asoshi renemdar. Iba asayamung ya Kalinga Stadium kübok Gymnastics Centre nung asayatsü.

Junior Championship ya Brehostibarnü tenzüksü aser Senior Championship ya January 2 nü nungi tenzüka asayatsü.

Iba asayamung nung ajak senteper asayar 550, support staff 120 aser official 100 densema nisung 750-i shilem agitsü. Asayar tem ya Gymnastics Federation of India nung züngoksema aliba unit 28 nungi asütsü.

WFI achaayangtsü atema IOA-i Ad Hoc Committee ka shim



Sanjay Singh

Luchii/December 27, 2023 (Agencies): Sanjay Singh-i aniba telok suspend sütsütsü asoshi Sports Ministry-i telemtetba agiba sülen WFI inyakyim achaayangtsü atema Indian Olympic Association-i ad hoc committee ka tentettsüogo.

Wrestling Federation of India tir tasenba Sanjay Singh-i, U15 aser U20 wrestling nationals, UP kübok Gonda nung agitsü telemtetba agiba sülen iba telemtetba agia liasü. Gonda ya Brij Bhushan Sharan Singh tamendakdak lir.

Committee nung Bhupinder Singh Bajwa, IOC EC Member, aser MM Somya o Manjusha Kanwar nunger densema lir.

Ad hoc committee tinyaktsüji, asayartem shima internatonal asayamungtem

nung shilem agidaktsütsüba aser linük nung asayamung balala ayongzüka asayatsü asoshi lir.

Maneni committee yagi bank account tem anepalutsü aser WFI indang website tem achaayangtsü.

WFI election aiben thia arur agi, koba Brij Bhushan den kanga junga sendaktepa alisang Sanjay Singh-i ayong ayonga koka liasü. Pai tir menden atema toktepa mapang Anita Sheoran tsükdaktsü aser iba sülen imla maliba tatalokba aika ajangshia arudar.

Olympic aser Commonwealth Games medallists Sakshi Malik, Bajrang Punia aser Vinesh Phogat nungeri anir Brij Bhushan anema longkak ait, shiba sexual harassment ken o nung aija liasü.

Sanjay Singh-i election akokba sülen Sakshi-i la asaya nungi anenba sangdong aser Punia-ia pa indang Padma Shri award meyipa agüja liasü.

Iba sülen anogo ana shi lir Phogat-ia Ato Kilonser dangi shiti ka ajanga laia la indang Major Dyan Chand Khel Ratna aser Arjuna Award meyipa agütsütsü ta shia liasü.

Women National Camp atema Hockey India-i asayar 34 shim



Luchii/December 27, 2023

(Agencies): Senior women's hockey coaching camp koba Bodhbarnü tenzükogo, iba camp nung asayar 34-i shilem agidar. Iba camp ya Ranchi nung asayatsü aliba Olympic Qualifiers aser Hockey5s World Cup dak rangloker ayongzüka agidar.

5 Nations Tournament nung Belgium, Germany, Ireland aser Spain den asayaba sülen India nunger asayartem mapang tatsüka tsüngda camp nung adentsü. Iba asayamung ya Spain nung asaya liasü.

Olympic Qualifiers ya Ranchi nung January 13 nungi 19 tashi asayatsü, kong India team Pool B nung New Zealand, Italy aser United States of America den ata lir.

Pool A nung Germany, Japan, Chile aser Czech Republic lir.

India team-i Jharkhand Women's Asian Champions Trophy, Ranchi nung kanga junga asayaogo aser Qualifier nunga junga asayatsü imla alitsü.

"Olympic Qualifiers masaya tsüngda 5 Nations Tournament ya tetendangba asayamung tajung ka liasü. Onoki team kechi nungsa melenshitsü nüngdaker aji reprangtetogo aser item ya metongshitsü merangtsü," ta Janneke Schopman-i ashi.

Olympic Qualifiers sülen India team Muscat, Oman-i aotsü, kong parnok January 24 nungi 27 tashi Hockey5s World Cup asayatsü.

India team:

Goalkeepers: Savita, Rajani Etimaru, Bichu Devi Kharibam, Bansari Solanki.

Defenders: Deep Grace Ekka, Gurjit Kaur, Nikki Pradhan, Uditia, Ishika Chaudhary, Akshata Abaso Dhekale, Jyoti Chhatri, Mahima Chaudhary.

Midfielders: Nisha, Salima Tete, Sushila Chanu Pukhrabam, Jyoti, Navjot Kaur, Monika, Mariana Kujur, Sonika, Neha, Baljeet Kaur, Reena Khokhar, Vaishnavi Vitthal Phalke, Ajmina Kujur.

Forwards: Lalremsiami, Navneet Kaur, Vandana Katariya, Sharmila Devi, Deepika, Sangita Kumari, Mumtaz Khan, Sunelita Toppo, Beauty Dungdung.

Premier League: Liverpool temaba jenjangi tuogo

Luchii/December 27, 2023

(Agencies): Mongolbarnü Burnley den asaya goal 2-0 agi akokba sülen Liverpool pur Premier League nung temaba jenjangi tuogo. Iba asaya nung Darwin Nunez-ia goal ka idakja liasü, shiba asaya aika goal ka danga magütsüteti aruogo.

Mongolbarnüsa Manchester United-ia goal 3-2 agi Aston Villa kokogo.

Liverpool aser Burnley na asaya nung Jurgen Klopp-i aniba team yagi asaya tenzüker mapang tatsüka tsüngda Nunez ajanga goal ka idaktsü aser goal idaktsütsü asoshi maongka aika ngutetaka midaktsüteti asaya ao.

Nunez-i iba season nung goal ti idakja lir aser asaya 12 sülen Mongolbarnü ya mezüngbuba goal idakja liasü.

Diogo Jota, shiba yiruba ajanga ita aika masayai lir tang asaya tenzükogo, pai Liverpool atema tanabuba goal idakja parnok temaba jenjangi tuogo. Parnok point ana agi Arsenal dang nungi timba kümogo, shirnok asaya ka agi ishiba asayar lir.

Brehostibarnü West Ham den asaya kokra Arsenal pur

maneni temaba jenjangi atutsü.

Kasa mapang nung Old Trafford nung United aser Villa na asaya Villa puri asaya mezüngbuba shilem amokbanger asaya-a John McGinn aser Leander Dendoncker nati goal kaka idaktsür parnok goal 2-0 agi tejakdang liasü.

Ajisüika asaya tanabuba shilem nung Alejandro Garnacho-i United pur atema mezüngbuba goal idaktsü. Iba sülen ano Garnacho-isa tanabuba goal idaktsü aser tatemsa Hojlund-ia goal ka idakja parnoki asaya goal 3-2 agi koka liasü.

Iba asaya makok tsüngda United pur tetoktepa ajak nung asaya pezü tashi khen danga takok mongui asaya liasü. Villa akokba sülen United pur tang Premier League nung trokbubai tuogo.

Maneni tanaga asaya ka nung Newcastle aser Nottingham Forest na asaya nung Chris Wood-i hat-trick ka idakja Forest puri goal 3-1 agi Newcastle kokogo.

Asaya nung Newcastle atema goal ka ya Alexander Isak-i penalty ka ajanga idakja liasü.

BILEMDANGANG

"Temaotsü züngdanga lira tenüngsang agi sünger alitsü."